



AGINDUA, INGURUMEN ETA LURRALDE POLITIKAKO SAILBURUARENA, ZEINAREN BIDEZ ONARTZEN BAITA GORBEIA (ES2110009) KONTSERBAZIO BEREZIKO EREMU (KBE) IZENDATZEKO DEKRETU-PROIEKTUARI ALDEZ AURREKO ONARPENA EMATEA

2010eko irailaren 6ko Aginduaren bitartez, Atlantikoko eskualde biogeografikoko kontserbazio bereziko eremuak (KBE) eta Atlantikoko eta Mediterraneoko eskualde biogeografikoetako kontserbazio bereziko eremuak (KBE) izendatzeko Dekretua onartzeko espedienteari hasiera ematea erabaki zen. Eremu horien artean Gorbeia ES2110009 BGL zegoen.

Ikusi ahal izan denez, Gorbeian, 43/92/EEE Zuzentarauaren I. eranskinean jasotako Batasunaren intereseko 26 habitat-mota daude. Horrek guztiak balio natural handiko eremua eta ingurune-aniztasuna sortu ditu; horren ondorioz, baso naturalak, mendiko txilardiak eta larreak, harkaitzak, hezeguneak (Altubeko urmaelak, Saldropoko hezegunea, esfagnalak, etab.) eta errekek batera existitzen dira. Bestalde, nabarmentzekoak dira Habitat Zuzentarauaren II. eranskinean jasota datozen flora-espezieak, hala nola *Narcissus pseudonarcissus ssp. nobilis*, *Narcissus asturiensis*, *Trichomanes speciosum* edo *Spiranthes aestivalis* orkidea. Eta ezin da ahaztu galzoriko espezieetat katalogatutako 8 flora-espezie eta 7 kaltebera daudela, Espezie Mehatxatuen EAEko Zerrendari jarraiki.

Faunari dagokionez, Gorbeiak ondoen kontserbatuenetako hegazti-faunaren multzoa du, baita EAEko mendi ingurune adierazgarrienetakoa ere, basoko, harkaiztiko eta goi-mendiko inguruneen espezie adierazgarrien komunitate egituratua baitu. Ugaztunak ere interes bereziko taldeak dira; besteak beste, honako hauen presentzia da azpimarratzekoa: muxar grisa (*Glis glis*), marta (*Martes martes*), ipurtatsa (*Mustela putorius*), basakatua (*Felis silvestris*), bisoi europarra (*Mustela lutreola*) eta igaraba (*Lutra lutra*). Anfibio- eta narrasti-espezie batzuk ere aipatzen dira.

Baina eremu horrek Naturagune Babestuen tipologia bikoitza biltzen du, Parke Naturala eta Natura 2000 Sareko kontserbazio bereziko eremua baita. Beraz, apirilaren 15eko 1/2014 Legegintzako Dekretuaren bidez onartutako Natura Kontserbatzeko Legearen testu bateginaren (hemendik aurrera, NKLTB) 18. artikuluari jarraiki, eremu hori antolatze mekanismoak koordinatu egin behar dira eremuaren plangintza integratuko duen dokumentu bakar batean biltzeko; horrela, kategoria bakoitzean aplikatu daitezkeen araubide desberdinek osotasun koherente bat osatuko dute.

Parke Naturalen kasuan, bi tipologia arautzen dituen dokumentu bakarraren lege-aurreikuspena ezin da gauzatu, legeak berak ezartzen baitu tipologia horiek Natura Baliabideak Antolatze Plan (NBAP) batek (NKLTBaren 20. artikulua) eta EKPZ batek (NKLTBaren 27. artikulua) arautu behar dituztela. Hala ere, bi baliabide horiek Naturagune Babestuaren (NB) bi tipologiaen premiak betetzeko baliagarriak izan daitezke, nahiz eta helburu eta eduki desberdinak dituzten.

Gainera, onartzean, kontuan hartu behar da Eusko Jaurlaritzak eta foru-organismoek dituzten eskumen konkurrenteak koordinazio-ahalegin berezia dakartela. Izan ere, NBaren bi



tipologiaren deklarazioa Eusko Jaurlaritzari dagokio edonola ere (NKLTBaren 19.1 artikulua). Parke Naturalei dagokienez, NBAPa bideratzea eta onartzea Eusko Jaurlaritzaren eskumena da (NKLTBaren 7.a artikulua); EKPZrako, aldiz, prozedura bifasikoa betetzen da. Hau da, lehenik, foru-organismoek bideratzen dute eta organismo horiek onartzen dituzte Parke Naturalaren kudeaketari dagozkion jarraibideak; eta bigarrenik, Eusko Jaurlaritzak bideratzen du, araudiari dagokionez (NKLTBaren 29.e artikulua). Bestalde, KBEei dagokienez, helburuak eta araudiak onartzea Eusko Jaurlaritzaren eskumena da (NKLTBaren lehen paragrafoko 22.5 artikulua) eta neurriak foru-organismoek dagozkie (NKLTBaren bigarren paragrafoko 22.5 artikulua). Nolanahi ere, baliabide desberdin horiek guztiak EHAAr argitaratu behar izaten dira beti.

Gaur egun, koordinazio hori ez da posible izango. Izan ere, beste eremu batzuen egokitzapena atzeratzea ekarri duen NBAP batzuen tramitazio luzeak sortutako eragozpenez gain, behin betiko onartzeko zain dagoen EKPZ dokumentua EAEko Natura Kontserbazio Legeak ekarritako arau-aldaketaren aurretik bideratu zen, eta ez ditu betetzen NKLTBaren 18. artikulua aipatzen duen dokumentu bakarraren izaeraren parametroak. Artikulu horren arabera, dokumentu horrek honako hau jaso beharko luke: batetik, Gorbeia Natura 2000 Sareko eremua kudeatzeko jarraibideak eta neurriak, 22.5 artikuluekin bat; eta, bestetik, 27. artikuluari dagokion Gorbeia Parke Naturalaren Erabiltzeko eta Kudeatzeko Plan Zuzentzailea.

Dekretuaren eduki eta onartze-prozedurari dagokienez, adierazi beharra dago prozedura hasi ondoren martxoaren 11ko 1/2010 Legeak eta urriaren 10eko 2/2013 Legeak Natura 2000 Sareari dagozkion lege-aldaketa batzuk eragin dituztela Euskal Herriko Natura Babesteko ekainaren 30eko 16/1994 Legean; horren guztiaren ondorioz, apirilaren 15eko 1/2014 Legegintzako Dekretuak onartzen duen Euskal Autonomia Erkidegoko Natura Kontserbazio Legearen testu bategina sortu da; horrela, behar bezala betetzen dira bertan lege horiek.

Horregatik, aldez aurreko onespina jasotzen duen Dekretuaren helburua Gorbeia Natura 2000 Sareko kontserbazio bereziko eremu izendatzea eta Habitat Zuzentzarauaren 6. artikulua horrelako KBEetarako eskatzen dituen kontserbazio-neurriak onartzea baino ez da; beraz, 18. artikulua ezarritakoa betetze aldera, dokumentuak egokitzea geroko utzi da, azken xedapenetan lehenean jasotakoarekin bat.

Dekretuak zati artikulatu labur bat eta hiru eranskin ditu. Lehen bi eranskinek Eusko Jaurlaritzak izendapena egiteko eskumeneko alderdiak jasotzen dituzte, NKLTBaren 22. artikuluekin bat, eta honako hau biltzen dute: lekuaren eta bere mugaketaren kartografia, izendapena arrazoitzen duten Batasunaren intereseko habitat motak eta animalia- eta landare-espezieak, horien kontserbazio-egoerari buruzko balorazio bat, lekuaren kontserbazio-helburuak eta jarraipen-programa bat. Hirugarrenak, aldiz, foru-aldundiaren eskumeneko alderdia jasotzen du, hau da, foru-organismoak landu eta onartu beharreko KBEaren kudeaketa-neurriak; horretarako, foru-organismoak orain aldez aurretik onartzen den dekretu-proiektuak ezartzen dituen helburuak hartuko ditu kontuan.

Dokumentu biak elkarrekin argitaratu beharko dira EHAAr. Horregatik, administrazio bien arteko lankidetzak bideak garatu behar dira, emaitzak helbururako koherenteak eta

eraginkorrak izateko, eta, aldi berean, herri partaidetza behar bezalakoa izatea ahalbidetzeko.

Xedapen Orokorrak Egiteko Prozeduraren abenduaren 22ko 8/2003 Legea betetze aldera, dagoeneko dekretu-proiektu egituratu bat landu denez, eta 2010eko irailaren 6ko Aginduko planteamenduekin bat, honako hau

EBAZTEN DUT:

Lehenena.- Dekretu-proiektuari alde aurreko onarpena ematea. Horrek "Gorbeia" (ES2110009) Kontserbazio Bereziko Eremu (KBE) izendatu eta eremu horri dagozkion kontserbatzeko neurriak onartzen ditu.

Bigarrena.- Onartzeko prozedurarekin jarraitzea, Kontserbazio Bereziko Eremuak (KBE) izendatzeko Dekretua onartzeko espedienteari hasiera ematea erabakitzeko den 2010eko irailaren 6ko Aginduak aurreikusitako izapideei jarraiki. Hala ere, NKLTBan jasotako araudi-aldaketek ekarritakora egokitu beharko dira.

Gainera, aipatu beharra dago hasiera emateko Agindu horrek aurreikusten zuela dekretu-proiektuak genero eraginaren ebaluazioa bete beharra, baina Emakundek aurreko agintaldian bideratu eta onartutako dekretuen inguruan emandako txostenak ezarri zuen horrelakoek ez zutela genero eraginaren ebaluazioa bete behar; beraz, izapide hori ez da beteko.

Hirugarrena.- Agindu hau Arabako eta Bizkaiko foru-aldundietara bidaltzea, espediente osoaren kopiarekin batera; horrela, proiektu honetan ezarritako kontserbazio-helburuen baitan, NKLTBaren 22.5 artikulua bigarren paragrafoak aipatzen dituen kudeaketa-jarraibideak lantzeari ekin diezaion.

Laugarrena.- Hiru administrazioen arteko lankidetzak sustatzen jarraitu beharko da, dokumentuen behar bezalako ezarpena egiteko; horrela, posible bada, dokumentu osoaren baterako informazio publikoko izapidea egingo da, hau da, Eusko Jaurlaritzaren zatia eta Arabako eta Bizkaiko foru-aldundien zatia batera.

Vitoria-Gasteizen,

INGURUMEN ETA LURRALDE POLITIKAKO SAILBURUA

Izpta: ANA OREGI BASTARRIKA.